



REPUBLIKA E SHQIPËRISË
**AUTORITETI I KONKURENCËS
KOMISIONI I KONKURENCËS**

VENDIM

Nr. 537, Datë 20.07.2018

“Mbi autorizimin e përqendrimit të realizuar nëpërmjet shitjes dhe transferimit të aksioneve të BFSE HOLDING B.V tek shoqëria AMRYTA CAPITAL LLP.”

Komisioni i Konkurrencës me pjesëmarrjen e:

Znj. Juliana LATIFI	Kryetar
Z. Eduard YPI	Zv/Kryetar
Znj. Leida MATJA	Anëtar
Znj. Adriana BERBERI	Anëtar
Z. Helidon BUSHATI	Anëtar

Në mbledhjen e tij të datës 20.07.2018, shqyrtoi çështjen me:

Objekti: Autorizimi i përqendrimit të realizuar nëpërmjet shitjes dhe transferimit të aksioneve të BFSE HOLDING B.V tek shoqëria AMRYTA CAPITAL LLP.;

Baza Ligjore: Nenet 2, 10-12, neni 24, germa d, dhe nenet 53-64 të ligjit nr. 9121, datë 28.07.2003 “Për Mbrojtjen e Konkurrencës”, i ndryshuar, rregullorja “Për zbatimin e procedurave të përqendrimit të ndërmarrjeve”, udhëzimi “Për formën e njoftimit të përqendrimit” dhe formulari i njoftimit të përqendrimit”.

Komisioni i Konkurrencës, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë, mbi njoftimin e përqendrimit mbi shitjen dhe transferimin e aksioneve të BFSE HOLDING B.V tek shoqëria AMRYTA CAPITAL LLP.;

VËREN SE :

Transaksioni dhe përqendrimi

Shoqëria NOA SHA, me shkresën Nr 235 Prot., datë 06.04.2018 “Njoftim lidhur me ndryshimin e kontrollit të tërthortë të shoqërisë NOA SHA”, ka informuar Autoritetin e Konkurrencës lidhur me ndryshimin e kontrollit të tërthortë të kësaj shoqërie, për shkak të shitjes së aksioneve BFSE Holding B.V tek shoqëria Amryta Capital LLP.

Shitësi: BFSE Holding B.V është një kompani private me përgjegjësi të kufizuar, e cila ushtron aktivitetin si një shoqëri financiare Holding duke ofruar një gamë të gjerë shërbimesh financiare, regjistruar dhe me seli në Hollandë.

Shoqëria kontrollon në mënyre të tërthortë shoqërinë NOA SHA, e cila është shoqëri aksionare me aksionarë NOA Cooperatief U.A që zotëron XX të aksioneve dhe NOA Holdings N.V XX të aksioneve. NOA SHA është institucion financiar jo-bankë (SFJB), licencuar nga Banka e Shqipërisë dhe ka objekt të aktivitetit: të japë kredi, të kryejë pagesa dhe arkëtime, të emetojë, pranojë dhe administrojë instrumentet e pagesës, të ofrojë shërbimin e këmbimit të monedhave, të ofrojë garanci të tjera, të shërbejë si agjent financiar/rikuperues i kredive me probleme dhe konsulent, etj.

Blerësi: Amryta Capital LLP, është një partneritet me përgjegjësi të kufizuara e themeluar dhe që vepron në përputhje me legjislacionin Anglez dhe Wales, me seli në Mbretërinë e Bashkuar.

Vlerësimi i përqendrimit

Në datën XXX, është nënshkruar Marrëveshja për shitjen dhe blerjen e të gjithë kapitalit aksionar të emtuar të BFSE Holding BV nga Amryta Capital LLP (Blerësi). BFSE Holding B.V zotëron XX % të aksioneve të NOA Cooperatief U.A, e cila është aksionari kryesor i NOA Holdings N.V dhe kjo e fundit zotëron XX % të kuotave të shoqërisë NOA SHA

Transaksioni i propozuar është ndryshimi i kontrollit të tërthortë të shoqërisë NOA SHA nëpërmjet shitjes dhe transferimit të aksioneve të BFSE HOLDING B.V tek shoqëria AMRYTA CAPITAL LLP.

Transaksioni plotëson kriteret e përcaktuara në nenet 10 dhe 12 të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar duke përberë objekt shqyrtimi dhe vlerësimi nga Autoriteti i Konkurrencës.

Referuar nenit 3, pika 7, të ligjit nr. 9121, datë 28.07.2003 “Për Mbrojtjen e Konkurrencës”, i ndryshuar, si edhe udhëzimit nr.76, datë 07.04.2008 “Për përcaktimin e tregut përkatës”, tregu përkatës i produktit u konsiderua tregu i kredisë, mikrokredisë, qirasë financiare dhe faktoringut të ofruara nga SFJB-të dhe tregu përkatës gjeografik konsiderohet territori i Republikës së Shqipërisë.

Në tregun e kredisë, mikrokredisë, qirasë financiare dhe faktoringut të ofruara nga SFJB-të operojnë gjithsej 22 ndërmarrje, tre nga të cilat zënë XX % të tregut, nëntë ndërmarrje kanë pjesë tregu më të vogël se XX % dhe dhjetë ndërmarrje të tjera kanë pjesë tregu më të vogël se XX %.

Shoqëria NOA SHA zë XX % të portofolit të kredisë, mikrokredisë, qirasë financiare dhe faktoringut të ofruara nga SFJB-të.

Transaksioni i synuar nuk do të sjellë asnjë ndryshim në tregun shqiptar të kredisë, mikrokredisë, qirasë financiare dhe faktoringut të ofruara nga SFJB-të dhe pjesa e tregut e shoqërisë NOA SHA do të mbetet e pandryshuar pas transaksionit.

Si konkluzion ky përqendrim nuk shfaq shenja të kufizimit të konkurrencës në treg ose në një pjesë të tij në veçanti, si rezultat i krijimit ose forcimit të pozitës dominuese.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të ligjit nr. 9121, datë 28.07.2003 “Për Mbrojtjen e Konkurrencës”, i ndryshuar,

VENDOSI:

1. Të autorizojë përqendrimin e realizuar nëpërmjet shitjes dhe transferimit të aksioneve të BFSE HOLDING B.V tek shoqëria AMRYTA CAPITAL LLP.
2. Tregu i kredisë, mikrokredisë, qirasë financiare dhe faktoringut, të ofruara nga SFJB-të, të jetë objekt monitorimi për një periudhë 1 vit nga data e shpalljes së këtij vendimi.
3. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

KOMISIONI I KONKURRENCËS